

Date – 04/12/2025
Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. **Lai Autonomous District Council (LADC) hnuiaia 12th Member of District Council (MDC) inthlanpui 2025 chu nimin khan tluang taka neih a ni a, vote hi za zelah 83.99 % a tla a ni.**
2. **Social Welfare Minister Pi Lalrinpui'n pianphunga rualbanlo, vohbikte pualin sorkarin hmasawna tur hmachhawp a kalpui mek tih a sawi.**
3. **Lok Sabha chuan Central Excise (Amendment) Bill, 2025 a pass.**
4. **President Droupadi Murmu chuan pianphunga rualbanloten midangte anga enkawlina inangtlang an dawn hunah khawtlangin hma a sawn thei chauh ang a ti..**

<><><>

LADC–MDC ELECTION 2025: 83.99% VOTER TURNOUT

Lai Autonomous District Council (LADC) hnuiaia 12th Member of District Council (MDC) inthlanpui 2025 chu nimin khan tluang taka neih a ni a, vote hi za zelah 83.99 % a tla a ni.

Nimin zing dar 7 atangin LADC huamchhunga MDC bial 25 a Polling Station 111-ah te tluangtak in EVM hmanga vote thlak a ni a. LADC huamchhungah hian vote - 56, 873 awmin, EVM - a vote tla zawng zawng hi - 47, 769 a ni a, za zelah 83.99 % a tla a ni. LADC - ah hian MDC seat- 25 (+ 4 Nominated Seat) awmin Candidate - 80 an awm.

Inthlan tikhaihlak zawnga tualchhung a tanga boruak duhawm lo hriattur a awm loh laiin, Lungtian-II Polling Station a First Polling Officer Pu Israel MS Dawngliana, kum 43 Lawngtlai Council Veng chu nimin zing khan a mu kaihthawh zawh a ni lova, nimin khan a ruang hi Lawngtlai panpui a ni.

District Election Officer Pu Donny Lalruatsanga chuan Pu Israel MS Dawngliana'n a chhungte leh a kalsante Lalpan thlamuan se a duh thu sawiin, chhawmdawlina awmthei ang ang ngaihtuah a nih tur thu a sawi a, Lungtian-II, Polling Station-ah pawh Inthlanna tluang takin kalpui zui a ni a ti.

Central Young Lai Assiciation ruahmanna in Branch YLA te an huamchhung theuhah boruak duhawm lo thleng palh thei veng leh Vote thlaktur tanpuingate tanpuiin an duty a, Lawngtlai khawpui chhunga Polling Station hrang hrangte MPF hruaitute tlawhin, District Election Officer bakah Election Observer pathum ten ngun takin an vil bawk.

Bial 25 awmna LADC-ah Vote nei 56,873 awmin Candidate 80 an awm a, ZPM chuan bial awm zawng zawng bial 25 an chuh kim a, MNF in bial 20 ah Candidate neiin, Congress in bial 14 ah Candidate an nei a, BJP in bial 10 Candidate neiin Independent a chuh mi 11 an awm bawk.

Inthlanna buaipuituten nimin tlai atang khan Inthlanna-na hmanrua te Lawngtlai panpui nghalin, Government Lawngtlai College a Pindan awmkhauh-ah venhimna khauhtak hnuaiah Inthlanna hmanruate hi dahluh niin, December 9, karleh Thawhlehi zing dar 8 atangin Inthlanna a Vote trlate hi chhiar a ni ang.

<><><>

ARCHEAOLOGICAL EXCAVATION

Tunlai thiamna hmanga pi pu sulhnu hlu hai chhuah hna - Archaeological Excavation Thawhnhina (Phase-2) chu, nimin khan Khawbung BDO Pu Lalchhandami Pachuau chuan Champhai District a Dungtlang hmun hluiah a hawng.

Pi Lalchhandami Pachuau chuan, pi leh pute sulhnu, Mizo Archaeologist thiam tak tak te'n an hai chhuak chho mek chu Tuipuiral tlangdunga pi pu sulhnu chanchin zirchianna atan a hlu hle dawn tih a sawi a. Pi leh pu te chanchin hi thua inhlanhawn (oral tradition) ringawt chuan, tunlai zirmite tuihalna a phuhru pha tak tak lo nia sawiin, hetianga hmalak a nih theihna atan ngaihtuahna, tha leh zung tam tak sengtu te chu fakawm a tih thu a sawi bawk.

Hma latu zinga mi Dr Lalhminghlua chuan, nikum thal laia an laih tawh atanga a lan danin Dungtlang hmun hluiah hian, hun bi hrang hrana mihring lo chen tawhna chhawng thum (three layers) a awm tih sawiin, heng hun bi hrang hranga hun leh kum erawh a chhutna turin sample an la la kim thei lo tih a sawi. A thawh hnihna hna tan lehah hian carbon dating tur emaw, thermo-luminescence dosimeter emaw hmanga teh tur sample tha an hmuh theih ngei a beisei tih a sawi bawk a ni.

Tuna Dungtlang hmun hluia pi pu sulhnu hlu zirchianna (Archaeological Excavation at Dungtlang old Settlement site, Champhai District) hi North Eastern Council, Shillong atanga sum hmuh niin Art & Culture Dept leh Higher & Technical Institute of Mizoram ten an buaipui a ni.

<><><>

INTERNATIONAL DAY FOR PERSONS WITH DISABILITIES

Social Welfare Minister Pi Lalrinpui'n pianphunga rualbanlo, vohbikte pualin sorkarin hmasawna tur hmachhawp a kalpui mek tih a sawi.

Social Welfare department bakah SELCO, ALYMCO, ZEP, NIELD, Directorate of AYUSH leh Persons with Disabilities lama tlawngai pawla thawktu tangho ten an buatsaih, International Day for persons with Disabilities puala Dawrpui Multipurpose Hall, Aizawla nimina hun hmannaah he thu hi a sawi a, Pi Lalrinpui chuan pianphunga rualbanlo, vohbikte tan sorkar chuan hmasawna tur hmachhawp a kalpui mek thu leh vohbikte chu ngaih pawimawh an nih zia a sawi a, SELCO Foundation leh Mizoram sawrkar thawhona chu ropui a tih thu sawiin, tunlai thiamna avanga hmasawna hmuh theih khawpa lang chu chhuanawm a tih thu a sawi a. Sawrkarin vantlang hmunte chu rualbanlote tan awlsam zawka an chet theihna tura ruahman zel a tum tih sawiin India ram pum huap infiamna lamah Mizoram aiawh rualbanlo ten lawmman an la thei chu chhuanawm a tih thu sawiin, Vohbikte chu theitawp an chhuah phawt chuan eng kawngah pawh sang tak an thleng thei tih inhre reng turin a chah a ni.

He hunah hian Khualzahawm State Commissioner for Persons with Disability Pi Vanlaldiki Sailo pawhin thusawiin, Mizorama Vohbikte dinhmun hmasawn mek leh hmalam huna sorkar leh tlawmngai pawl hmalaknate ngaihven a chhawr tangkai turin kalkhawm te leh rualbanlo te chu a sawm a ni.

Kuminah hian United Nations chuan thupui bik- Rualbanlo te huapzo khawtlang hmasawna tih a ruat a, tukin khan International Day for Persons with Disabilities pual hian Rally neih a lo ni a, District hrang hrangah he ni pual hian hun hman a ni bawk.

World Disabled Day hi Champhaiah chuan Block Resource Centre Training Hall-ah Dist. Social Welfare Officer (DSWO) Pi Thelma R.Zonunmawii hoin hman a ni a, Serchhip-ah District Bawrhsap Pu Paul L. Khuma hovin DC Pisapui Hall-ah hman niin, Saitualah chuan DC Conference Hall-ah Bawrhsap Dr. Lalngura Tlau hoin hman a ni bawk.

<><><>

NO TOLRANCE WEEK

Mizoram hmun hrang hrangah ngaihhnathiamna tel loa lirthei endikna hun 'NoTolerance Week' hman mek a ni a, tunkar Thawhtanni atanga Khawzawl khawpui chhunga an neih mekah nimin tlai thleng khan lirthei dan bawhchhia mi 42 an man tawh.

Khawzawl Police te hian Thawhtanni atang khan No Tolerance Week hi hmangin Vengthar Bazar leh Taidawnkawnah te an Duty bakah khawchhung an fang kual bawk a. Lirthei dan bawhchhia mi 42 an man atanga pawisa an chawi tlingkhawm hi Rs.83,000/- a tling a ni.

Lirthei dan bawhchhia zingah hian Two Wheeler-ah chuan Helmet khum lo leh Document fel lo an tam ber a, heng bakah hian Wrong Side a tlan, Park phal lohna hmuna lirthei Park, Side Glass vuah lo leh lirthei khalth laia meizial zu man te an awm bawk a. Four Wheeler-ah chuan License nei lo leh Document fel lo an tam ber a ni.

<><><>

SPORTS MINISTER

Sports & Youth Services Minister Pu Lalnghinglova Hmar in India ram huapin infiamna huangah Mizo te dinhmun a la sang tawk lo tih a sawi a, hmasawna a awm theih nan kalphung thlak a ngai tih a sawi.

Nimina Woodland Hills, Zonuama Sports Incentive Cash Award hlannaah he thu hi sawiin, Sports Minister chuan Mizote'n infiamna an tuipui ang hu leh an thawm a nat ang hui infiamna lama Mizoram dinhmun chu a la hniam hle a ti a. National Games-a Mizoram dinhmun an thlir chuan an ropui lo hle a, 28-na a ni pha tawk a, India-ah a hniam pawl a ni tih sawiin, hei vang hian kalphung thlak a ngai a ti a, hmasawn turin a bul thut atanga tan leh a ngai dawn tih sawiin naupang kum 8 atanga kum 15 inkar te tana siam Empowering Mizoram Sports hnuai game chawikan lehzual bik tur 8 an thlang a ti a, National Games a Mizoram hnuk hnai theitu a nih an beisei avangin theitawp an chhuah dawn tih a sawi bawk a ni.

Sports Minsiter chuan Mizoram dinhmun chu an pawm a ngai tih sawiin, Olympic-ah medal an la beisei ngam lova, tel phak nih chauh a la ni a ti a, EMS in a tum ber chu Olympics 2036-ah Mizo infiammi a tam thei ang ber tel tir ve thei turin hma an la dawn a ti a, thla thar December ni 15 hian khawvel huapa mithiam Japan-a centre for coaching excellence deputy director nilai Prof Masamitsu chu Mizoramah lo kalin infiammite zirtirtu tur coach te a zirtir dawn a, hemi hmang hian danglamna thlen chhoh tir an tum dawn tih a sawi.

Sports Minister chuan infiamna-ah Tribal quota a awm ve loh avangin tih tak takna nen inbuatsaih a ngai a ti a, Sports hmasawna tura rawtna thlen duh an awmna nih chuan an dawng thei reng tih a sawi bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

CENTRAL EXCISE

Lok Sabha chuan Central Excise (Amendment) Bill, 2025 a pass. He dan thar hian Central Excise Act,1944 a rawn siamtha dawn a. Excise duty a tihpun abakah vaihhlo siamchhuah atanga chhiah a a tihpung dawn a. Heng cigarette, cigar, hookah tobacco, sahdah, zarda leh scented tobacco ah te chhiah hi lak pun a ni ang.

Zawhbelhna chhangin Union Finance Minister Nirmala Sitharaman-i chuan dan siamthat chu thil thar anih loh thu leh chhiah tihpunna a ni lo a ti a, GST awm hma atang daih tawha chhiah lo lak dan anih thu a sawi a ni.

<><><>

PRESIDENT

President Droupadi Murmu chuan pianphunga rualbanloten midangte anga enkawl na inangtlang an dawn hunah khawtlangin hma a sawn thei chauh ang a ti. Nimina National Award for the Empowerment of Persons With Disabilities, New Delhi-a a semnaah he thu hi sawiin Pi Murmu-i chuan heng rualbanlote hian khawngaih aiin zahna leh dik taka enkawl an mamawh zawk a ti bawk. Vawiin inkhawmah hian President hian rualbanlote chawikanna tura hna thawk tha mimal leh pawlte hnenah chawimawina a hlan a. Pi Murmu-i heng mi chhuanawm tak takte hi mite thilunga thusawitu an nih thu a sawi a ni. President Murmui chuan rualbanlote dawmkan nan sawrkarin infiamna a hmang tangkai hle tih a sawi bawk a ni

<><><>